

Tunumiut Kalaallisuuinik Kalaallisuuliornermut Ilinniarfissamik Naalakkersuisut Tasiilami pilersitsiniarnissaat pillugu peqquneqarnissaannik Inatsisartut aalajangiiffigisassaattut siunnersuut

(Inatsisartuni ilaasortaq, Laura Táunajik, Siumut)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Tunumiut Kalaallisuuinik Kalaallisuuliornermut Ilinniarfissamik Naalakkersuisut Tasiilami pilersitsiniarnissaat pillugu peqquneqarnissaannik Inatsisartut aalajangiiffigisassaattut Inatsisartuni ilaasortaq Laura Táunâjik, Siumut siunnersuutaanut Naalakkersuisut qujapput.

Kalaallisuutta kulturikkut kingornussarsiatta kinaassutsinnillu ilaalluinnarneranik taakkulu tanngassimaarutigisariaqarneranik siunnersuuteqartup oqaatigisai Naalakkersuisut isumaqatigaat. Ieqqutoqaapput kinguaariiaarluni kingornunneqartarsimasut ullunik pingaartitatsinnik nalliuttorsiorilluta atortakkagut. Ieqqutoqqat kulturitsinnut ilaalluinnartut illersorneqarlutillu siunissami piujuaannartittariaqartut.

Taamaattumik nunatsinni kalaallisuut assigiinngitsut atorneqartartut ilisimaneqarnerulernissaanik aammalu tamakku sananeqartarnerinik ilisimasat attanneqarnissaanik kissaatit Naalakkersuisunit arajutsisimaneqanngillat. Ilinniartitaanikkut suliniutit siuarsaataasinnaasut eqqarsaatigalugit tamakku nunatta naleqartitaanik nunattalu pisariaqartitaanik aallaaveqarlutik ineriartortinneqartarnissaat Naalakkersuisut tamarmiusut kissaatigaat.

Kalaallisuuliornermik Ilinniarfimmi ilinniarfiup ataatsimiititaliaata immikkut piginnaasaqalernissaq siunertaralugu ilinniartitaanerup ingerlanneqarsinnaanissaa kissaatigisimavaa, assersuutigalugu kalaallisuut Qaanaameersut tunumeersulluunniit immikkut piginnaangorsarfiginerisigut. Tamatuma kingunerisaanik tunumiut kalaallisuuinik Tasiilami kalaallisuuliorfiliorsinnaanissamut periarfissat misissorlugit aallartinneqarput. Ilaatigut Kalaallisuuliornermik Ilinniarfimmi ulluinnarni aqutsisut junimi 2016-imi Tasiilamut tikeraarsimapput Tunumiut kalaallisuuinik mersornermik pikkorissartitsisarnissanut periarfissat misissoriartorlugit.

Pineqartut saniatigut Tasiilami ingerlariaqqiffiusumik ilinniarfimmik pilersitsillunilu ingerlatsisoqalersinnaanera Naalakkersuisut Naalakkersuisooqatigiinnissamik isumaqatigiissutaani immikkut isiginiarneqarpoq. Tassunga atatillugu suleqatigiissitamik ilinniartitaanerit sorliit uunga tunngatillugu aallartinneqarsinnaanersut misissuisussamik pilersitsisoqassaaq.

Taamaattumik Tasiilami Tunumiut kalaallisuuinik kalaallisuuliorfiliorsinnaanissamut periarfissat suliamut aallartinneqareersumut ilaatillugit misissorneqarnissaat pissusissamisuussaaq, Tamatumalu kingunerisaanik Naalakkersuisut imaattunik allannguutissatut siunnersuuteqarput:

Tunumiut kalaallisuuinik kiisalu kulturikkut tammatsaaliinissaq timitalerumallugu, Tasiilami ilinniarfiliassanut allanut ilaatillugu siunertap ilanngunneqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

Naalakkersuisut taamatut oqaaseqarlutik allannguutissatut siunnersuutip akuerineqarnissaa inassutigaat.